

# **FEDERATA E PINGPONGUT E KOSOVËS**

## **RREGULLORE**

### **PËR REGJISTRIMIN E KLUBEVE TË PINGPONGUT DHE TË ANËTARËVE TË TYRE**

## I. DISPOZITA TË PËRGJITHSHME

### Neni 1.

Me këtë Rregullore, rregullohet mënyra dhe kushtet për regjistrimin e klubeve të pingpongut dhe të anëtarëve të tyre, e drejta e paraqitjes, kalimi i lojtarit nga një klub në tjetrin, shkuarja e lojtarit në botën e jashtme, licencat e lojtarëve, fuzionimi-bashkimi i klubeve, fshirja nga regjistri, puna e Komisionit për regjistrim, mënyra e mbajtjes së evidencës, si dhe çështje të tjera të rëndësishme për regjistrim.

### Neni 2.

Me aktin e regjistrimit klubet dhe anëtarët e tyre e fitojnë të drejtën për t'u paraqitur në garat e pingpongut, në stinorin garues për të cilin janë regjistruar.

Lojtari, i cili nuk është regjistruar në FPPK, nuk mund të paraqitet në çfarëdo gare që është në kompetencë të FPPK-së, përveç lojtarëve shtetas të Kosovës, të cilët janë të regjistruar në klubet e jashtme dhe të cilët sipas dispozitave të ITTF-it mund të paraqiten për përzgjedhjen e Kosovës. Kohëzgjatjen e stinorit garues e cakton Bordi ekzekutiv i FPPK-së.

### Neni 3.

Regjistrimin e klubeve dhe të anëtarëve të tyre e bën komisioni për regjistrim i FPPK-së.

Regjistrimi bëhet në kohën prej 1 qershorit deri më 31 korrik të vitit rrjedhës.

Përgjatshimisht, gjatë tërë vitit garues, mund të bëhet ripërtëritja e regjistrimit dhe regjistrimi i parë i lojtarëve për grupmoshën e juniorëve dhe kadetëve. Juniorët e regjistruar pas afatit për regjistrim mund të marrin pjesë në gara vetjake por jo edhe ekipore.

### Neni 4.

Me rastin e paraqitjes së kërkesës për regjistrimin e klubeve dhe të anëtarëve të tyre, si dhe për vazhdimin e regjistrimit paguhet taksa e regjistrimit, e cila është e ardhur burimore e FPPK-së.

Lartësinë e taksës së regjistrimit e cakton Bordi ekzekutiv i FPPK-së.

### Neni 5.

Klubet munden, që me ekipet dhe lojtarët e tyre, të paraqiten vetë nëse e kanë regjistrimin e rregullt për atë stinor garues, gjë që e dëshmojnë me dokumentet e vërtetuara.

Për çdo lojtar të regjistruar lëshohet vërtetimi libereza e garave, në të cilën shënohet data e regjistrimit, përkatësisht ripërtëritjes së regjistrimit dhe datën kur lojtari i caktuar e fiton të drejtën për të luajtur.

Vërtetimi garues nuk është i vlefshëm pa kontrollimin e mjekut.

## II. REGJISTRIMI I KLUBEVE

### Neni 6.

Kërkesën për regjistrim ose për ripërtëritjen e regjistrimit, klubi ia parashtron Komisionit për regjistrim të FPPK-së në dy kopje. Kërkesa për regjistrim ose për ripërtëritjen e regjistrimit duhet të përmbajë patjetër: Emrin e klubit, vendin dhe adresën e selisë së klubit, emrin, adresën dhe numrin e telefonit të personave përgjegjës (kryetari, sekretari) dhe personave të autorizuar për kontakte me FPPK-në.

### Neni 7.

Për regjistrimin e parë të klubit është e nevojshme të bëhen:

- Kërkesa për anëtarësim me obligim të pranimit të veprimit në pajtim me statutin e FPPK-së, me Rregulloret dhe vendimet e organeve të FPPK-së,
- Fotokopjen e vërtetuar të regjistrimit në regjistrin e shoqatës së qytetarëve\*,
- Kërkesën për regjistrimin e së paku 6 anëtarëve,
- Dëshminë që klubi i përmbush kushtet për t'u marrë me veprimtari sportive të përcaktuar me Ligjin mbi sportin\*.

### Neni 8.

Çdo vit klubi duhet ta vazhdojë regjistrimin. Për vazhdimin e regjistrimit të klubit bëhet:

- Kërkesa për vazhdimin e regjistrimit,

- Kërkesa për regjistrimin e së paku 6 anëtarëve.

#### **Neni 9.**

Komisioni për regjistrim është i obliguar që brenda 30 ditëve nga data e pranimit të kërkesës ta bëjë regjistrimin.

Nëse regjistrimi nuk është bërë, Komisioni për regjistrim është i obliguar që ta informojë klubin në afat prej 30 ditëve nga data e pranimit të kërkesës, për arsyet e mospranimit të regjistrimit.

#### **Neni 10.**

Klubi, përkatësisht lojtari janë të obliguar, që në afat prej 7 ditësh nga marrja e vendimit pozitiv të Komisionit për regjistrim, ta paguajnë taksën e caktuar për regjistrim (dhe për vazhdim të regjistrimit).

Klubi përkatësisht lojtari (nëse ka të bëjë me regjistrimin e mëvonshëm individual) nuk kanë të drejtë të lojës derisa të mos e paguajnë taksën për regjistrim.

Nëse obligimi i lartpërmendur nuk është plotësuar as në afatin prej 30 ditëve, do të konsiderohet se vendimi për regjistrimin e klubit, apo lojtarit as që është bërë, gjegjësisht që e tërë procedura as që ka filluar.

#### **Neni 11.**

Për të gjitha ndryshimet me rëndësi për regjistrim, të cilat janë bërë gjatë rrjedhës së stinorit garues, klubet janë të obliguara që ta informojnë Komisionin për regjistrim në afat prej 10 ditëve nga ndryshimi i bërë.

#### **Neni 12.**

Kur bëhet bashkimi i dy ose më shumë klubeve, klubi i posaçëformuar regjistrohet në pajtim me dispozitat e nenit 7 të kësaj Rregulloreje.

Klubi i krijuar në këtë mënyrë (me bashkim) nuk do të mund të regjistrohet derisa klubet që bashkohen të mos i kenë kryer të gjitha obligimet.

#### **Neni 13.**

Në rast të ndryshimit të emrit, klubi paraqet:

- Kërkesën për ndërrimin e emrit, duke shënuar emrin e vjetër dhe të riun,
- Vendimin e organit të klubit, i cili është kompetent për ndërrimin e emrit,
- Fotokopjen e vërtetuar mbi regjistrimin me emër të ri në regjistrin e shoqatave të qytetarëve

\*.

#### **Neni 14.**

Klubi, i cili për vitin rrjedhës nuk e bën regjistrimin nuk mund të paraqitet në asnjë nivel të garave që është në kompetencë të FPPK-së.

#### **Neni 15.**

Klubi do të shlyhet nga evidenca e FPPK-së nëse nuk e dorëzon kërkesën për vazhdimin (ripërtëritjen) e regjistrimit në afat prej dy vjetësh nga data e regjistrimit të fundit.

### **III. REGJISTRIMI I GARUESVE**

#### **Neni 16.**

Si garues mund të regjistrohen të gjithë shtetasit e Kosovës, të cilët janë anëtarë të njërit nga klubet e pingpongut të Kosovës.

Nuk mund të regjistrohet personi i rritur, i cili nuk i ka të gjitha drejtat qytetare.

Me pajtimin e lidhjeve të tyre nacionale mund të regjistrohen edhe shtetasit e huaj anëtarë të klubeve të pingpongut të Kosovës.

Vendimin për afatet për procedurën e regjistrimit për stinorin e ardhshëm e bjen Bordi ekzekutiv i FPPK-së në fillim të çdo viti rrjedhës.

#### **a) Regjistrimi i parë**

#### **Neni 17.**

- Me kërkesën për regjistrim të parë, Komisionit për regjistrim i dorëzohet:

- Deklarata e nënshkruar për anëtarësim në klub, (te personat e mitur me bashknënshkrimin e prindit-kujdestarit),
- Fotografia me madhësi 3x4 cm, jo më e vjetër se 6 muaj,
- Deklarata me shkrim se deri më tani nuk ka qenë i regjistruar,
- Dëshmia mbi shtetësinë.

## **b) Ripërtirja e regjistrimit**

### **Neni 18.**

Ripërtirja e regjistrimit të garuesit llogaritet regjistrimi i sërishëm për klubin e njëjtë për të cilin lojtari ka qenë i regjistruar në stinorin garues që i ka parapri stinorit për të cilin regjistrohet.

Lojtari, i cili nga afati i caktuar me vendimin e Bordit të FPPK-së në fillim të vitit paraparak, nuk paraqet në FPPK fletëparaqitjen e nënshkruar për klub të ri automatikisht regjistrohet për klubin e deritashëm për stinorin e ardhshëm garues, përveç nëse lojtari nuk paraqet deklaratën për pushimin e anëtarësimin në klub.

### **Neni 19.**

Kalimi i lojtarit nga klubi në klub bëhet në afatin kalimtar, të cilin në fillim të çdo stinori garues e cakton Bordi ekzekutiv (sipas nenit 16.) deri kur kalimet duhet të jenë të përfunduara.

Për të gjithë dokumentacionin lidhur me procedurën e regjistrimit që dërgohet me postë (vetëm rekomande) e vlefshme është data në vulën e postës, kurse për të tjerat që dërgohen personalisht data e protokollimit në FPPK.

### **Neni 20.**

Për çdo stinor të ardhshëm garues lojtari mund të nënshkruajë fletëkalimin për cilindo klub sipas dëshirës së tij pa fletëlëshimin e klubit të deritashëm.

Të gjitha obligimet në relacionin klubi-lojtari zgjidhen me kontratën e ndërsjellë qytetare.

### **Neni 21.**

Në rast se lojtari e nënshkruan fletëkalimin për më shumë klube, do të regjistrohet për klubin i cili e ka fletëkalimin me datën më të hershme, me ç'rast si e plotëfuqishme merret data në vulën e postës me dërgesë rekomande FPPK-së apo data e protokollit nëse fletëkalimi është dërguar individualisht në FPPK.

Përfundimisht nga kjo mund të jetë vetëm marrëveshja, ndërmjet klubeve të interesuara dhe lojtarëve, e vërtetuar te protokolluesi publik.

## **c) Regjistrimi i lojtarëve të huaj për klubet kosovare**

### **Neni 22.**

Për t'u bërë regjistrimi i shtetasit të huaj për klubin e Kosovës Komisionit për regjistrim duhet t'i dorëzohet:

- Fletëkalimi i nënshkruar me dorë klubit për të cilin dëshiron të regjistrohet lojtari i caktuar deri në afatin e vërtetuar (sipas nenit 16) të kësaj Rregulloreje,
- Leja e federatës së huaj nacionale, më së voni deri 1 korrik të vitit rrjedhës.

### **Neni 23.**

Lojtari i huaj do të jetë i regjistruar për klubin e Kosovës edhe në rast se leja e federatës së huaj nacionale vjen edhe pas 1 korrik, e më së voni deri më 31 janar të vitit të ardhshëm, por me të drejtë të paraqitjes vetëm në garat ndërkombëtare të klubeve.

### **Neni 24.**

Lojtari i huaj, i cili e merr shtetësinë kosovare pas mbarimit të afatit kalimtar nuk ka të drejtë të paraqitet në garat që janë në kompetencë të FPPK-së gjatë stinorit rrjedhës garues dhe deri në fund të stinorit mund të bëjë gara vetëm si lojtar i "huaj".

Klubi mund të ketë më shumë lojtarë të huaj të regjistruar, por të drejtë paraqitjeje në ndeshjen ekipore në kompetencë të FPPK-së ka vetëm një lojtar i huaj.

#### IV. KOMPENZIMI ME RASTIN E KALIMIT TË LOJTARIT NGA NJË KLUB NË TJETRIN

##### Neni 25.

Lojtarët, në Kosovë, mund të kalojnë nga klubi në klub lirisht çdo vit në afatin e caktuar kohor saktësisht, në pajtim me këtë Rregullore.

##### Neni 26.

FPPK-ja e vërteton të drejtën e klubit që me rastin e kalimit në klubin tjetër mundet të kërkojë dëmshpërblim për mjetet e investuara për zhvillimin e tyre derisa kanë qenë anëtarë të klubit në kategoritë e grup-moshave të reja.

Dëmshpërblimi mund të kërkohet te secili kalim i kadetëve dhe juniorëve të cilët në klub kanë kaluar, së paku dy vite dhe vetëm te kalimi i parë i lojtarit të rritur (senior) nga klubi në të cilin i ka kaluar dy vitet e fundit si junior.

##### Neni 27.

Vlerat e dëmshpërblimit janë dhënë në tabelën e cila është pjesë përbërëse e kësaj Rregulloreje dhe është shprehur në pikë.

Vlerën e pikës për afatin e përmendur kalimtar e cakton Bordi ekzekutiv i FPPK-së në mbledhjen e tij njëkohësisht kur vendoset edhe për afatet e kalimit.

Ranglista	Kadetët	Juniorët	Seniorët
<b>E Kosovës</b>			
1-5	1500	2500	5000
6-10	500	1000	3000
11-20	200	500	1000
<b>E Evropës</b>			
1-10	3000	6000	15000
11-20	1500	4000	10000
21-30	1000	3000	6000
30-50		2000	5000
51-100			3500

#### V. KALIMI I LOJTARËVE NË KLUBET E HUAJA

##### Neni 28.

Që një lojtar i Kosovës të mund ta marrë lejen nga FPPK-ja për të luajtur në Botën e jashtme, duhet t'i plotësojë këto kushte:

- Të nënshkruajë kontratën për obligimet ndaj përzgjedhjes së Kosovës,
- T'ia paguajë dëmshpërblimin klubit nga i cili largohet sipas kushteve nga neni 26 dhe tabelës nga neni 27 i kësaj Rregulloreje.
- Të paguajë taksën në FPPK sipas tabelës së vërtetuar për taksë, e cila është pjesë përbërëse e kësaj Rregulloreje.

##### TAKSA E KALIMIT NË BOTËN E JASHTME

a) lojtarët të cilët kanë qenë në përbërje në garat ekipore për përzgjedhjen e të rriturve, së paku 2 herë në katër vitet e fundit	2000 pikë
b) Lojtarët të cilët janë paraqitur për përzgjedhjen e Kosovës në garat vetjake, së paku 2 herë në katër vitet e fundit	1000 pikë
c) Lojtarët të cilët kanë qenë në përbërje në garat ekipore për përzgjedhjen e kadetëve dhe të juniorëve në katër vitet e fundit	1000 pikë
d) Të gjithë të tjerët	500 pikë

Vlerën e pikës e cakton Bordi ekzekutiv i FPPK-së në fillim të stinorit garues.

**Neni 29.**

Lojtari është i obliguar të paguajë taksën e vërtetuar çdo herë kur kalon nga klubi i Kosovës në klubin e huaj.

**Neni 30.**

Lojtarët e huaj që paraqiten për klubet e Kosovës nuk janë të obliguar t'i paguajnë FPPK-së taksën për kalim në klubin e huaj.

**VI. REGJISTRIMI I DYFISHTË**

**Neni 31.**

Me qëllim të krijimit të mundësisë së përparimit më të shpejtë të lojtarëve të rinj (juniorëve dhe kadetëve) lejohet regjistrimi i dyfishtë i lojtarëve të kategorive të reja për klubin tjetër me të drejtë të paraqitjes për klubin e ri vetëm në kategorinë e të rriturve, kurse lojtari i njëjtë do ta mbante të drejtën për t'u paraqitur për klubin amë në kategoritë më të reja.

Kohëzgjatja e regjistrimit të dyfishtë mund të kufizohet në një stinor garues dhe duhet të ripërtërihet në afate të njëjta sikur çdo kalim tjetër.

**Neni 32.**

Klubi mund të ketë më shumë lojtarë me regjistrim të dyfishtë, por të drejtë paraqitjeje në ndeshje ekipore në kompetencë të FPPK-së ka vetëm një lojtar me regjistrim të dyfishtë.

**VII. PROCEDURA E ANKESAVE**

**Neni 33.**

Kundër çdo vendimi të Komisionit për regjistrim mund të bëhet ankesë në shkallën e parë, në të cilën Komisioni është i obliguar të përgjigjet në afat prej 8 ditësh.

**Neni 34.**

Ankesa në vendimin e Komisionit për regjistrim parashtrohet Bordit ekzekutiv të FPPK-së në afat prej 7 ditësh nga dorëzimi zyrtar i vendimit të Komisionit për regjistrim. Bordi i FPPK-së do ta zgjidhë ankesën në afat prej 15 ditëve nga dita e dorëzimit të ankesës.

**Neni 35.**

Ankesat e bëra pas afatit nga neni 34, do të konsiderohen të vjetëruara. Vendimet e Bordit për të gjitha ankesat për procedurën e regjistrimit janë përfundimtare.

**VIII. E DREJTA PËR PARAQITJEN E EKIPIT**

**Neni 36.**

Lojtarët fitojnë të drejtën e paraqitjes që ditën e kryerjes së regjistrimit në afat të rregullt.

Lojtari i regjistruar e merr librezën e garave me fotografinë personale, e cila duhet të jetë e tillë që në bazë të saj të mund të bëhet identifikimi i lojtarit.

Lojtari është i obliguar që para çdo gare t'ua tregojë librezën e garave personave zyrtarë.

**Neni 37.**

Në librezën e garave duhet të vëhet vërtetimi për vizitën e bërë mjekësore.

Vërtetimi nuk guxon të jetë më i vjetër se sa që është paraparë me Ligjin për sport dhe atë mund ta lëshojnë vetëm organizatat e autorizuara mjekësore. \*

**IX. KOMISIONI PËR REGJISTRIM**

**Neni 38.**

Bordi i FPPK-së e emëron Komisionin për regjistrim. Komisioni për regjistrim përbëhet nga tre (3) anëtarë dhe punon në mbledhje, në të cilat mbahet procesverbali.

Mandati i komisionit zgjat aq sa zgjat mandati i Bordit, i cili e ka emëruar.

#### **Neni 39.**

Komisioni për regjistrim:

- Bën regjistrimin e klubeve dhe të anëtarëve të tyre dhe për këtë lëshon dokumentacionin gjegjës sipas kësaj Rregulloreje;
- I zgjedh ankesat e shkallës së parë,
- E udhëheqë evidencimin e klubeve dhe lojtarëve,
- E jep pëlqimin për kalimin e lojtarëve në klubet e huaja,

#### **Neni 40.**

Dokumentet e regjistrimit udhëheqen nga parime publike, të hapura, të sakta dhe të vërteta. Çdo klub dhe lojtar duhet ta ketë kartonin e tij, në të cilin shënohen të gjitha të dhënat relevante për regjistrimin dhe paraqitjen e lojtarit.

### **X. DISPOZITA PËRMBYLLËSE**

#### **Neni 41.**

Ndryshimet dhe plotësimet e kësaj Rregulloreje bëhen sipas akteve dhe mënyrës së caktuar për nxjerrjen e tyre.

Interpretimin e dispozitave të kësaj Rregulloreje e bën Bordi i FPPK-së.

#### **Neni 42.**

Kjo Rregullore është miratuar në Kuvendin e FPPK-së të mbajtur më 11.05.2002 në Prishtinë dhe hyn në fuqi më 01.07.2002.

***Vërejtje: Nenet e hijëzuara do të hyjnë në fuqi pas miratimit të Ligjit mbi Sportin. Hypjen në fuqi të këtyre neneve do ta miratojë Kuvendi i FPPK.***

Kryetari

Sherafedin Zhitia